

Script of Morning Gojri News Bulletin 03 August 2025 at 1015Hrs

مارننگ گو جری نیوز بلیٹن مورخہ 03 اگست 2025

یوہ آکا شوانی جموں ہے محمد امین انجم تیں خبر سُنو۔

LG History

لیفٹنٹ گو رنر منوج سنہا نے کہیو ہے جے بھارت غو قدیم علمی نظام تعلیم غو اک حصو ہونو چاہیے۔ اُنہاں نے لکھاڑیاں نانہ کہیو جے ویں پھر تیں تاریخ لکھیں، جہیڑی ماضی مانہ تروڑی مروڑی گئی وی ہے۔ موصوف شیر کشمیر بین القوامی کا نفرنس مرکز مانہ قومی بُک ٹرسٹ این بی ٹی غی طرفوں منعقد ہون آلا 9 روزہ چنار کتاب میلہ غی افتتاحی تقریب سنگ خطاب کر رہیا تھا۔

JK Encounter

جموں کشمیر غا کُلگام ضلع مانہ دہشت گرداں غے خلاف چل رہی کا روائی مانہ 3 دہشت گرد ہلاک کر دتا گیا ہیں۔ یاہ کا روائی ضلع غا اکھل دیو سر علاقہ مانہ چل رہی ہے۔ پولیس ذریعہاں نے کہیو ہے جے اِس ٹاکرا مانہ ہون توڑی 3 ہے پچھانو دہشت گرد ما ر مکایا گیا۔ اِس سلسلہ مانہ کا روائی جمعہ غی رات تیں چل رہی ہے۔ دسیو گیو ہے جے علاقہ مانہ موجود دہشت گرداں نے گولی باری شروع کی جس غا نتیجہ مانہ یوہ تصادم شروع ہو گیو۔ اِس ضمن مانہ پورا علاقہ نانہ گھیرا مانہ لے غے اُن جان غا تمام رستہ بند کر دتا گیا ہیں۔ تانجے دہشت گرد فرار نہ ہو جائیں۔ اِس بارے مزید تفصیل غی اجوں اڑیک ہے۔

Har Ghar Tiranga

جموں کشمیر غا تمام ضلعان مانہ کل عظیم حُب الوطنی غا جذبہ نال " ہر گھر ترنگا" مہم شروع ہو گئی۔ 15 اگست 2025 تک چلن آلی اِس مہم غو مقصد طالب علماں مانہ قومی فخر نانہ ترقی دینو ہے۔ اِس سلسلہ مانہ اسکولان غی دیوار ترنگا جھنڈا نال خوبصورتی سنگ سجائی جا رہی ہیں۔ اِس بارے اساتذہ تے طالب علم سرگرمی نال بکھ بکھ سرگرمیاں مانہ حصولے رہیا ہیں۔

Rana Darhal

ذمہ دار سرکار ہون بارے سرکار غا عزم غی تائید کرتاں واں وزیر جنگلات جاوید احمد رانا نے مینڈھر پونچھ مانہ اک عوامی رسائی دربار لایو۔ اِس پروگرام مانہ نزدیکی گرایاں تیں مقامی لوکاں غی سرگرم حصے داری دیکھی گئی۔ لوکاں نے سیلاب غی وجہ تیں ہوا نقصان سڑکاں، پانی غی سپلائی مانہ بے قاعدگی تے اسکولان غا کمزور بنیا دی ڈھانچہ جیسا مسائل وزیر موصوف غے باندے رکھیا۔ جناب رانا نے صبر نال لوکاں غا مسائل سُنیا تے یقین دوايو جے اُن غا مسائل ویلے سر حل کر لیا جائیں گا۔ اِس رسائی پروگرام غو مقصد زمینی سطح ور لوکاں غے حصے داری مضبوط کرنو، تے براہ راست ترقیاتی فکر مندیاں غو حل کرنو تھو۔ اِس عوامی رسائی دربار تیں انتظامیہ غی

گلی طور ور ترقی آلے پاسے دھیان نالے دور دراز تے متاثر خطاں مانہ لوکاں نانہ سرکا ر غے نزدیک لیاں غی عکاسی ہوئے۔

Rana-Altaf Education

جموں کشمیر مانہ وزیر جا وید احمد رانا تے ممبر پارلیمنٹ میاں الطاف احمد نے ضلع پونچھ غا مینڈھر علاقہ مانہ مکہ پبلک اسکول غو افتتاح کیو۔ اس موقع ور اجتماع نال خطاب کرتاں واں لیڈراں نے اسکول غی مجموعی رسائی غی تعریف کی۔ اس سلسلہ مانہ جناب رانا نے زور پایو جے تعلیم تبدیل کرن آلی ہونی چاہیے، نہ کہ رٹا نال پار کی وی۔ انہاں نے تعلیم مانہ جنسی بروہری غی تگڑی وکالت کی۔

JK Excavation Shivlings

اک نمایاں کم مانہ محکمہ آثار قدیمہ نے قدیم ہندو مورتیں ڈھونڈی ہیں۔ جن مانہ شولنگ وی شامل ہیں۔ یہ مورتیں وادی کشمیر غا ضلع اننت ناگ تیں اُس ویلے ملی ہیں جد ایشمقام غا سلیا علاقہ غا کرکوٹ ناگ مانہ مرمتی کم چل رہیو تھو۔ مذکورہ مورتیں عوامی کمان کاجاں بارے محکمہ پی ڈبلیو ڈی غے تحت چل رہیا کم غے دوران اک مقامی مزدور نانہ ملی ہیں۔ آثار قدیمہ محکمہ غا عہدیداراں نے جگہ غو معائنہ کیو تے اس طرح ان مصنوعات نانہ سائنسی ٹیسٹ واسطے سرینگر بھجیو گیو، تانجے اُن غی عمر غو اندازو لایو جا سکے۔ قابل ذکر ہے جے یاہ جگہ کشمیری پنڈتاں واسطے روحانی اہمیت رکھے۔

Kishtwar Asp Block

اک نمایاں حصولیابی مانہ کشتواڑ غی مڑواہ بلاک نانہ نیتی آیوگ انعام واسطے چُنیو گیو ہے۔ اس سلسلہ مانہ چوگان گرانوڈ کشتواڑ مانہ 4 اگست نانہ انعام تقریب منعقد ہون غو نقشہ کار ہے۔

JMC Clean Jammu

اک اہم سبز کوشش مانہ جموں میونسپل کارپوریشن تے شہری جنگلات ڈویژن 5 اگست سویر 9 بجے ایف آر ایم سی کمپلیکس نروال مانہ اک بڑی شجر کاری مہم غو انعقاد کریں گی۔ صاف تے سرسبز جموں غا ایکن حصہ غے طور ور 10 ہزار بوٹا لایا جائیں گا۔ اس سلسلہ مانہ کشمیر ڈاکٹر دیوانش یا دنو نے شہریاں نانہ کہیو جے ویں اس مہم مانہ حصولیں۔ اس سلسلہ مانہ 30 ہزار بوٹا پہلاں بی لایا جا چکا ہیں تے اس طرح یوم آزادی تک 60 ہزار بوٹا لان غو ہدف ہے۔

اس غے نال ہی خبراں غو یوہ بلیٹن ختم ہوو۔